



Nunatsinni innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigisassaattut siunnersuut. Ilinniarfiusinnaasutut suliffiusinnaasutullu piukkunnaatillit qanoq tapersorsorneqartiginerannik aammalu inunnit pineqartunit inuiaqatigiinnillu pisariaqarneratut atorineqartiginerannik erseqqinnerusumik qulaajaanermik misissuineq imaqassaaq, soorluttaa misissuineq innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqarneranik malitseqartinneqassasoq.

(Inatsisartunut ilaasortaq Aqqa Samuelsen, Inuit Ataqtigiit)

(Siullermeerneqarnera)

Demokraatini nuannarutigaarput inuit piginnaasakitsut matumani ataatsimiinnermi pisinnaatitaaffeqalerulersinneqarmata inuit innarluutillit tapersorsorneqarnissaannut inatsit nutaaq aqqutigalugu.

Inuit innarluutillit imaluunniit inuit piginnaasakitsut ilinniarnissaminnut sulilernissaminnullu assigiimmik pisinnaatitaaffeqalernissaasa qularnaarnissaat nunatsinni nukinnik annertuseriaatissatut isigaarput. Sulisinnaasut tamaasa pisariaqartippagut. Taamaattumik toqqissisimanarpoq Naalackersuisut siunnersuuteqarnissaq sioqqullugu suliamik aallartitsisimmamata siunertaralugu innarluutillit pillugit kommunit nalunaarsutaasa kiisalu suliffeqarneq ilinniarnerlu pillugit nalunaarsuutit ataqtigiissaarnissaat. Taamaasilluta tamakkiisumik takusinnaanngorparput immikkoortumi sumiiffinni sorlarni ineriartortitsisoqarsinnaassanersoq.

Innarluutillit tapersorsornearnissaannut inatsit nutaaq innuttaasut ataasiakkaat pisariaqartitaannik aallaaveqarmat isumalluarfigaarput aamma qularnaarneqarmat arlaannut ilinnialernissamut suliffeqalernissamulluunniit kissaateqartoqarpat annerusumik akulerutsitsisoqartartussanngormat.

Neriuppugut sulisut inunnik tamakkunanga immikkut pisariaqartitsisunik kiffartuussisalersussat ilinniartilluarneqarumaartut innuttaasut piginnaasakitsut pisinnaatitaaffeqarneri naapertorlugit kiffartuussisinnaanngorlugit aamma neriuppugut ilaqquttat qanigisallu taamatut suliap ingerlanerani akulerutsinneqartarumaartut.

Ajoraluartumik ullumi takusarparput arlaannik innarluutilinnut ilaqutaasut qanigisaasulluunniit pisinnaatitaaffinnut inatsisinullu innarluutillit pisariaqartitaat tunngavigalugit sullissisussanit ilisimasaqarnerusarnerat. Demokraatini isumarput naapertorlugu tamanna killormoortussaagalarpoq.

Naalackersuisut suliassaq aallartereersimammassuk aamma sulisut innarluutilinnik sullissisussat inunnut innarluutilinnut inatsit nutaaq tunngavigalugu sullissisalernissaminnut ilinniartinneqarluarnissaat pillugu isumalluarluta siunnersuut manna itigartipparput.